

千

山

詩

集

千山詩集卷五

博羅剩人可禪師著

七言古

過北里讀徂東集

余家五嶺本炎方孤身遠竄三韓地四月五月不知春
六月堅冰結河底今年天氣稍冲和秋盡雪飛到山寺
出門仰天天欲沉隻杖棲棲過北里北里先生擁毳吟
詩成煮雪訝予至未曾展讀淚先傾拭淚同歌悲風起
醫巫閭高碧嵯峨千疊萬疊嵐光積大壑一聲白晝昏

黑雲崩騰吼蒼兕須臾雲淨松杉青野泉泠泠石磊磊
東海洋洋大國風茫然萬頃中無砥海氣怒叱蜃氣枯
狂濤倒飛星月沸三盆流駛鳴江平寒鴈不鳴蛟龍寐
有時亟欲擲頭顱靈魚悔食神仙字有時稼穡自謀生
三尺穹廬團婦子有時噉酒罵虛空雷霆迅走黎丘惴
有時談笑和且平歡狎牛蛇羣白豕倏喜倏怒豈有常
欲殺欲活亦非意有時夜半步空塔一叩青冥尺有咫
沉魄千年呼盡來死者可生生者死舊帝宵啼五國荒
閨媛暮哭長城址華表山前鶴唳孤青塚猶聞月下秋
琵琶淒切胡笳悲未免有情誰遣此不知是血復是魂

化作吳刀切心髓心髓如鐵刀如水片片飛入陰山裏
陰山慘慘泉冥冥神農虞夏今已矣因思太古音尚希
噩噩渾渾難可冀尼山栖栖自衛歸苦樂憂傷各有旨
約畧刪餘三百篇發憤曾聞司馬氏何人繼者屈子騷
汨羅萬古流瀾瀾可憐秦火恨不灰漢室蘇卿唐子美
蘇卿嚙雪聲韻淒子美三遷足詩史五代波頹宋代儒
睂山山下出蘇軾蘇軾流離僑惠間珠崖鶴嶺供指使
更有文山第一人浩浩乾坤留正氣從此荒蕪將百秋
國初高楊追正始天下承平四海清人人含宮家嚙徵
琳瑯金玉廟堂音王李登壇執牛耳文長巨斧劈華山

中郎拍板逢塲戲景陵一出洗煩澆頓令榻管趨平易
風雅茫茫失所宗不得不推北地李李公英雄步少陵
匪特形似亦神似先生才凌北地高先生遇非少陵比
阿弟捐軀阿兄流西山之歌續二士不數秦關二百強
不羨蜀江千丈綺從來厄極文乃工所以論文先論世
豐干饒舌罪如山滔滔誰易今皆是三百年來事莫知
天教斯道存東鄙不然今古亦荒涼大雪紛紛吾與爾

大雨

去年秋潦森茫茫魚鼈沙虫登我床瑤宮巨室皆漂沒
何況流民茆札房死者橫流生者泣千口僅留不得食

努力高山挖草根至今面帶黃泥色
眼看麥短黍差長雖未入口心有望
上帝豈憂溝壑剝其雨其雨乃復狂
翻盤沉竈不肯止庭戶無光天重翳
誰能拔劍斬頑雲捧出日輪頭
上置流民流民柰若何生世坎壈
何其多兵革遺餘鄉國絕又見遠海
鼓風波老僧德薄命更鄙偃臥若
遭毒龍戲夜半滾滾浮枕頭不知
是淚還是雨

辛卯寓普濟作八歌

罪夫罪夫胡不死百千捶楚餘頭趾
鄉國遙遙一萬里中有蔓棘及弧矢
骨肉喪盡不得歸遠積蒼茫大風起
大風起兮沙閉天誰非人子令心怒
然安得手扶白日

今上照四塞之荒烟下照萬丈之黃泉

烏藤矯矯長七尺當時與爾初相得瞿曇倒退愁彌勒
共誇有眼明如日今來絕域支冰雪獅子晝眠狐跳立
藤兮藤兮詎終窮恐隨風雨兮化作龍何日將子兮直
上千峯與萬峯

有姊有姊夫早撇手持木櫛剪玄髮諸妹零星俱天折
最小尚餘安得活憶我出門姊幽咽忽聞姊死心割裂
吁嗟人生聚散兮若飛蓬東西雖隔兮望故叢只今長
別兮無時逢

有弟有弟字耳叔少年多病耽幽谷孝廉船覆青衫泥

三人惟爾守孤獨黃沙杳杳望兄回日暮走向荒城哭
哭聲到天今天不聞摧胃肝兮難久全休望收吾骨兮
葬江邊

父母生兒不得守山丘死者已矣生者流松楸日冷風
颼颼石人空立麋鹿遊昔煩朝使豐碑留煌煌天語題
上頭今日正清明誰人更澆一杯水團團荒草多新鬼
安得鶴歸華表兮盡洒千年之血淚

羅浮之山多蒿萊山上還留說法臺錦繡凋殘玉女哀
村底無人空落梅鐵橋流水尚滌迴白雲一出不復來
憶昔荷鋤闢荒草只今空向巫閭老何時再上羅浮道

辛苦前朝老衲衣十年與爾不相離骨殘心碎無完肌
至今襟袖血蹟遺誰云新者可代故何忍拋撇冬夏披
衲兮衲兮汝勿悲雖然破爛勝牙緋生禦風沙死裏屍
我歌我歌歌將歇攬衣忽起增哽咽我憂不獨在鄉國
我罪當誅復何說筆尖有鬼石流血天地無情難永訣
嗚乎木佛木佛能不衰猙颺苦雨四面來猙颺苦雨四
面來土床一尺魂徘徊

送鹿

爾宜隱山谷胡爲露厥角昔共雲中仙今同籠中鶴送
爾迢遞入長安盡道長安可行樂高車美食卽陷阱詎

料尊榮遭割剝小鹿無知大鹿髮悔曾飽噉新民粟新
民忍饑送爾行天道往復亦何速忽憶鍾山陵寢邊祖
崇德澤三百年歎忽運衰骨肉盡何況遠塞寄荒烟

老人行

噫吁戲危哉老人是百千萬劫之餘灰問其生時朝代
不敢說但云少壯尚無爲眼看富貴貧賤流三番兩番
肉作堆兒孫喪盡親戚死剩此零星乾枯骸紛紛眇者
扶跛者跛者扶眇者面凹骨削背復鮐離城十里五日
乃至登堦一尺如天台敢希鳩杖與麋粥但願脫籍歸
蒿萊堂上赫怒聲如雷叩頭出血誰汝哀昔日漢家天

子威海字父老子弟還相聚酒酣歌罷帝親語豐沛世
世無所與老人兮老人爾既赤手今且回生守官園餽
官馬死作泥土填官街

哀王孫

衰草無根疾風吹王孫不歸辱塗泥頭白老妻無完衣
鴛鴦到死猶雙飛自言有子長鬚髭垂暮泣血生別離
今我若此子烏知骨肉凍折命如絲左手執瓢右枯枝
此卽二人送老兒

大僧行

大僧結束何新鮮錦裁窄袖黑貂緣出門三禮釋尊前

翻身上馬揮金鞭玉作刀頭絨作鞵疾如飛鳥輕如烟
自言五上長安道目視漢官如蝨蚤歸來依舊守空門
獨立阜邊添馬草

偈仄行

偈仄復偈仄大地不容膝鳥飛翼折高踰尺岡上梧桐
化作棘薜荔晝呼何時息

贈戴三 有引

孝濱章江士也初不願從父之楚遊因披薙入
空門既聞其父見逐乃留頂髮代役海濱朝夕
樵采以供菽水胸懷盡裂余悲其志而作此詩

孝子大痴人不隨白馬隨黃塵白馬有時死黃塵無日
清夜寒看鹿柵朝出采鬼薪不識大風與大雪朝朝暮
暮海之濱曾懷裂盡面顏笑但願爺孃溫且飽

連雨

頑雲重霧裹城郭舊民新民慘不樂田中有黍誰能穫
山中有木誰能斲盤翻竈冷守空橐簷溜雖多不堪嚼
老僧一鉢久度閣出門半步泥沒脚紫蛇有光蝸有角
抱書晝臥腸蕭索庭邊杏樹驚搖落燕巢已破子漂泊
眼前大地何時廓遼海浪高勢磅礴願浮我屍填大壑
毋使蛟龍終日惡

送梨

不重紫花能消熱不羨張公大谷希只愛關東土上長
汁酸肉澀墨作皮王公一張口走殺百羣黎滿筐二百
或三百晝夜擔向玉京馳天下何處無凍梨王公何不
一念之

癸巳冬四日諸公同集普濟話別

去年十月遼陽道芒鞋蘸雪踏枯草今年十月將出門
北風吹髮凍逾早蕭條古廟城南隅鍾鼓不鳴鳥驚噪
何人連袂叩荒祠各出詩篇鬪天巧吏部文章足起衰
祁連千仞欣獨造毛錐如鐵面如水時復掀髯發長嘯

學士前身金粟是相逢
彈指霧烟掃興來墨汁自淋漓
明月一傾大栲栳
豫章宿將舊登壇
萬金散盡呼蒼昊
唾壺崩碎聲載塗
三郎瘦削偏靜好
布衲拋殘不耐寒
枯桐一撥鳳凰叫
廬江高士雪滿胷
六朝蕩滌存真藻
夢裏花深聽鷓鴣
冰池獨宿鴛鴦老
浙東公子神復清
屣露雙跟頂破帽
寫就黃庭不換鵝
向影閒吟孤自悼
更有青門種瓜人
五色不生形半槁
主人爲我張素筵
麩飀重疊燒龍腦
又汲參泉煮木鷄
粵橙漳橘恣一飽
衆音喧歷坐莫倫
雖無旨酒情潦倒
請翻二十一青編
如斯良會古來少
冷山寥落選娑單
夜郎僭耳徒遼邈

妙喜衡陽電白洪安得詩人共圍繞
杯冷歌殘聲黯悽
明看孤杖凌霜曉亦知此別春必來
寂寂三冬守空窅

憶江南

江南高座寺前對雨花臺臺上春風拂
而來參差楊柳
花競開黃鶯百轉我心哀忽憶故山村
底梅今年絕漠
冰雪堆髮白面皴骨欲摧村底無梅不
歸去却憶高座
聽鶯語

寒夜作

日光墮地風烈烈滿眼黃沙吹作雪
三更雪盡寒更切
泥床如水衾如鐵骨戰唇搖膚寸裂
魂魄茫茫收不得

誰能直劈天門開放出月光一點來

雪中歌

仲冬二日作

天傾地沸雲嘈嘈林木摧壓風怒號雪勢欲競浮圖高
恍如錢塘八月潮又如百羣仙鶴剪羽毛佇立骨戰身
飄飄竟欲乘之上遊遨足跨銀海步玉霄玉蟾真人手
親招直向梅花村底去千樹紛紛落如雨

海岸送人歌

水蕩蕩兮歸路長聖人出兮波不揚我送子兮蛟龍腸
安得從子歸兮天蒼蒼

朱姑歌

玉葉凋兮芳草枯恨從君兮君又徂君已徂兮妾生胡
爲乎噫妾今日死胡爲乎

橋上石

橋上石半是前人墳上碑細想當年立碑日兒孫羅列
盛威儀重重種樹重重護豈料墊人脚下泥車輪直輾
題名處牛蹄馬足紛交馳傳語後來人刻淺莫刻深刻
淺模糊刻深在長感千年行路心

築墳歌

去年西家築墳好今年東家築墳早東家築墳貼紙錢
已見西家犁作田田中又見生青草幾處種松能得老

前人白骨化爲塵重取和泥埋後人後人得埋且莫哀
君不見狐狸窟穴沙坡臺

雪花歌

天上紛紛雪山中樹樹花盡道梅花勝似雪我見雪花
勝梅花梅花開必著梅樹雪花下來隨所寓不擇高低
長短枝有風卽去無風住縱使風吹樹盡空在地還與
在樹同本來清白誰能污一任飄飄無定蹤梅花雖好
能幾日開落榮枯情不一君不見羅浮山下梅花村師
雄臥處生荆棘

花月歌

月出愛良夜花開聚名園幾見花開定無雨幾見月出
定無雲便使無雲無雨花月天誰能長艷復長圓世間
好景實無多醉月迷花柰爾何

山雪歌

山巍巍雪霏霏日夕隨風栖澗石夜寒和月照巖扉山
杳杳雪皎皎雪在山頭雪更高山頭有雪山逾老老僧
愛雪兼愛山歲歲山中自掩關每到冬來必見雪每到
見雪必開顏我心與雪何相似長欲空山抱雪死縱令
骨化定爲冰直至魂銷應作水我常對雪寂無聲雪來
見我如有情昔日袁安今日子相看相伴兩忘形從來

不願銷金帳羔羊美酒斟還唱人間行樂只片時曲殘
酒醒身凋喪亦不願高樓玉笛吹梅花落處使人悲此
中何限江南客對此安能不淚垂但願深山荒寺裏盡
日無人吾與爾只恐春來爾不禁寂寂相思從此始是
時天地苦冥冥山僧作歌山雪聽

千山詩集卷六

博羅剩人可禪師著

書記今羞編

五言律一

初釋別同難諸子

終歲愁連苦生離且莫哀問人顏尚在見影意猶猜
佛道千秋重湯仁一面開明知予未死好去勿徘徊

初發

馬上催行急歡生復自嗟身輕曾似葉泪落正如麻
計日邊城近傷心故國賒幸餘穿布衲猶可耐風沙

至永平

舊孤竹園

去國剛三日明朝欲到關故人從此盡禿鬢自今斑馬
恨如風疾心拚似石頑低頭思二士一望首陽山

宿山海關

重關猶未度破衲早生寒大海依然險危巒空自攢鄉
書萬里絕鼓角五更酸敢望能生入回頭仔細看

初至瀋陽

開眼見城郭人言是舊都牛車仍雜沓人屋半荒蕪幸
有千家在何妨一鉢孤但令舒杖屨到此亦良圖

初入慈恩寺

幸無牛馬後仍許見浮屠禮佛歡如舊逢僧笑盡呼膏
梁恣噉嚼土榻任跣趺半晌低頭想依然得故吾

思千山

咫尺白雲隔千山未許遊前王曾駐蹕幽客幾埋頭洞
壑愁中見烟嵐夢裏收可憐溪上水萬古自空流

生日四首

憶當論死際又過兩年期白日存吾分寒風任爾吹到
邊仍說法有客尚投詩且自歡茲會明冬不可知
未了黃沙債償他止一身便從今日死已是舊朝人乞
食真慚粟看書若有神無端思故事數點淚沾巾

四十未爲老顛危自古稀虛生成底事到死不知非弟
妹徒相憶家鄉那得歸從來無片紙辜負雁南飛
百歲已將半爲僧十二年殘軀委冰雪雙眼借人天只
有心方寸還餘詩幾篇時時吾笑我不改舊時顛

贈大通師

北宗夙所仰開藏見高名道德傳東海袈裟搭上京開
堂龍象踏卓錫鬼神驚多少南來衲皇途漸蕩平

秋望

長平無好景秋至益蕭森不到邊關外焉知天地心風
吹連野濶日落滿城陰骨肉消俱盡空餘一念深

偶成

禪誦何曾習幽幽我自親過雲如近性古木願爲鄰
午睡無多事平生只一真客來添禮數知是世間人

晚興

死去亦閒事奈茲朝暮寒菊殘秋色苦僧老梵聲乾
遇物皆心碎無天好眼看不如長閉戶跌坐夜漫漫

思友

知己良非易何時不可親况當流離際舉目兩三人
杯水必同聚空談亦有神毋論朝及夕相與爛天真

送鴈

舉目漫相送遙空影漸微自從來北塞幾度見南飛一
路新霜下三山古木稀明年望春信行矣莫遲歸

送燕

空梁如逆旅欲別故飛低天下皆秋氣何方更好栖風
流思舊夢月冷度前溪爾念余心在淒涼見落泥

重陽前三日

不能待九日力盡爲登臺故國知難望鄉心終未灰孤
烟生絕漠返景照荒萊策杖且還臥黃花何處開

懷友滄師

托跡長千里能無車馬喧世人來問法遠成獨懷恩定

有花侵案應知月到門
菊英已堪把日夕對誰殮

偶感

遷容易爲感况兼秋有聲
天風吹木葉一夜滿邊城
是處皆腸斷無時免淚零
不知何事切未必盡鄉情

夜雨

是夜聞秋雨蕭蕭更不禁
崎嶇萬里夢繚繞十年心
處世明知幻銜恩柰獨深
何曾待搖落悽愴到于今

雨中看菊

風雨暗邊關何人淚勿潛
我心與秋菊相向不成顏
倒臥從泥污飄搖倚石頑
眼看佳節近猶自憶龍山

雨中懷諸子

咫尺阻言笑其如風雨何
展書當事業壯志此消磨
竟日掩門戶千年一咏歌
寂寥頻得句相見較誰多

懷千山諸子

野衲還山去深居第幾重
遙知岩石側猶有漢唐松
施食下林雀安禪護洞龍
寄言諸老宿春曉待飛筇

傅子拓新齋

把茆亦已足拓地更精神
靜坐飽秋色開書見古人
童鳥時問難慧遠復來頻
何必桃花水蕭然卽避秦

遊譚家庵

諸山時閉閣當午不聞鐘此地足雲水往來多遠蹤酌
泉有妙理隱几卽孤峯繚繞香生霧應藏聽法龍

送人

去去莫回頭蒼茫塞上秋死生從此異人馬盡成愁不
敢高聲別唯應暗淚流他方倘相憶但索鬼門幽

小河

寂寂小河水波平意自閑更無舟楫苦獨有雪水艱衆
汲何曾損直行絕往還靜思源出處應在萬重山

送客

單身從此去鄉路尚悠悠兩點丈夫淚一天孤鶩秋幸

無爲客死未了此生愁
回望遷流處沙平黑霧稠

晚步

鐘聲隨我去隱隱度前灣
遙望深松暮應多野鶴還
客心在秋水微月出空山
任意緩歸步柴門不用關

暮歸

只向城西去非關風有期
聞歌知我至拋卷候門時
終日惟相對竟歸亦不辭
老僧出戶望偏怪步何遲

尋詩

只在秋山裏遍搜黃葉堆
忽然被我得却似古人裁
野月索將去寒風吹復來
還家囊已滿生死興悠哉

接薪夷書

憶君良獨苦書到益傷神衆命終難活一心不負人何
天堪問話無地可容身却望邊關外偏多風所親

對雪

九月尚春衣高林望已稀朔風從地起大雪近僧飛魚
懶寒誰擊塵閒靜不揮無人相問訊只合掩荆扉

八日雪中懷北里

爾時應獨坐把筆自題詩以此爲良計終年足療飢寒
新生遠思雪淨望幽姿明曉來相問携將菊一枝

懷甦築

煮泉方自酌，懷爾得詩題。料是開窓看無人，雪一溪句
從寒處索物向悟邊齊。但望空林霽，知余來踏泥。

懷我存

昨夜風吹雪，誰邊落更多。最憐愁與老，安得笑還歌。范
叔寒如此，陶公興若何。明朝采殘菊，著屐定相過。

九日偕諸子過北里

扶伴過城北，霜飛逐面來。爲尋楊子宅，不上單于臺。水
泛東籬菊，心存故國萊。從茲寒日甚，那得客顏開。

冒雪過甦築

所思何必遠，挾卷過西鄰。相見亦無爲，自然不厭頻。犬

迎遙識面雪下盡隨身此日倍蕭颯燒泉意甚真

雪中

道心宿何處風雪裹殘僧覓我了無有因人實不能磬
敲零敗葉佛坐老孤燈欲問平生事頽垣掛古藤

喜哥

流離方五歲隆隼異時兒所幸生年晚全無舊國思泥
深失龍性霜冷落瓊枝最是傷心處逢人自笑嬉

得千山諸老信

千山人有信望我到山中昨日滿山雪山風吹又空松
枝當戶入石徑與天通何得穿雙屐尋幽處處窮

荅千山諸老

我本山中客，山翁不用招。爲憐地主意，遂使白雲遙。花
雨遲飄落，松風暫寂寥。石床餘半席，只待雪初消。

夢遊千山

夜半分明到千山，萬木中霜花親骨肉。雀語動虛空，所
見無今日。相論盡古風，可憐非久住。床下叫寒蟲。

招山中諸老

傳言入雲去，勸汝下雲間。且看主人意，暫拋水石間。此
心無近世，隨地足深山。莫學高峯老，頻年坐死關。

夜雪

一榻渾如水雪天未肯明憐吾愁不寐到戶寂無聲白
滿思山谷寒多念友生正當孤絕際忽聽曉鐘鳴

聽北里彈琴

招我入太古孤琴此際聞林塘皆默默水月共云云指
外通心事絃中絕世氛民生慍未解何處覓南薰

北里新書屋二首

古聖亦局促圖書雨雪侵憑添數尺地不作百年心杏
樹籬穿老柴門晝掩深歌吟聽又滿餘響出寒林

卜居寧有意聊以禦寒冬殘瓦沿岡拾低垣帶雪春但
將書與共所貴月能容從此門前路時添雲水蹤

秋盡

秋光辭我去還似惜春心野雀翔空響寒雲到地陰不
能抒遠夢竟欲罷孤吟自此山門掩屐聲無近林

贈無瑕師

非關學辟穀少小便忘飢終日半瓢水長年一衲衣看
人只自老種樹已成圍來往邊城裏常愁白晝飛

寄姚氏昆仲

兄弟幽栖處開門水一方尋詩撐笠艇論易集空堂白
晝聽蛙吹青天數鴈行嶺頭三百樹好寫寄窮荒

寄龔韓二子

平生無半面禍患每過尋亂肆兩枯骨枯桐一片心道
同頑處合詩向酒中深後夜相思處開門月滿林

壽寒還

何物堪延歲携將數卷書到門惟有雪浮海已無桴飢
渴三仙字乾坤一老儒蓬萊如可至或許曳長裾

左公往堡中有懷

未必長相見初離嘆索居遙知兄及弟只有淚如珠踏
雪尋詩句循田得潦餘歸時屬二子亟爲報僧廬

和戴子堡中八咏

北山

未到山中去山中一片雲無心偏出岫何事屢移文
白鶴猶聞怨馴麋可與羣嗟我千丈壁不必勒前勳

夾河

苦雨添新漲懷人在水央雙浮天日月一濯我肝腸
泡影流將去閒愁蕩更長卜居應不遠誰與咏滄浪

石人

見說衣冠古投詩寄問頻我心曾匪石爾貌可爲人
蘿月長相憶山雲乍許親最憐同伴者一半是頑民

永興寺

豈料窮邊處還餘舊寶坊定多山下士同禮法中王
白

豕驚清磬寒猿到畫廊他時携竹杖應許借繩床

耕烟

嚼雪固余分犁雲爲汝憐何須至寒食時恐斷炊煙帶
雨將苗種拋鋤枕石眠只愁癡夢裏又到御爐邊

采蕨

采采山中蕨無爲席上珍同甘遼海雪難比故鄉尊到
壑猶聞禁盈筐未是貧老僧知此味好寄莫辭頻

蓮渚

污泥曾不染隔浦逶幽香何用沾新露猶然怯曉霜願
生諸佛國可集野人裳舊社荒蕪甚池塘夢正長

觀魚

子豈知魚樂過河泣欲枯未能忘浩蕩暫可免昏瓜夜
靜蘆花白天寒野艇孤願隨風雨去清夢到江湖

看薪夷病

看看垂死病悽愴淚沾巾原罪吾居長論貧爾作鄰天
全無可否藥尚有君臣莫畏泉臺苦水河久已親

喜薪夷病起

拚是沙埋骨欣聞息已蘇一瓊吞未盡雙眼淚將枯又
得吾良友仍餘爾罪夫從今知死易鎮日好相呼

庭前孤鴈四首

繪繳滿天地空門亦有憂暫依庭草宿敢望渚蘆遊夢
想洲前侶魂驚塞上秋預愁霜雪苦不得到羅浮

可是籠中物高飛不自繇鼎烹何足恨網解轉添愁獨
叫黃沙遠頻行竹逕幽主人情意重豈爲稻梁謀

塞草青易白堂堦日又曛自存湖海志聊共鶩鵝羣俯
首隨人語淒聲獨我聞舊行不可問腸斷萬重雲

仰天如欲訴側首聽鳴砧影隻月常照力微風易侵禍
深曾作字愁絕少知音久矣雲霄黯何須寄上林

同陳子過新齋感賦

每過必終日流離幾弟兄土床橫茗椀笑語雜書聲佛

道尊衣馬天心寵甲兵此時况此地猶見主人情

贈鄰翁

乞食固予分類過亦自憎如何君父子偏欲飽孤僧
鉢杭銅匙滑參泉碧盞澄只茲堪我老况爾坐高朋

讀顧與治書并見懷詩

一派江濤白驚生塞上魂乍疑驚瘦影再讀見啼痕
舊棗青衫盡空庭老樹存相思頻得句好寄莫辭煩

孟貞寄書不至

老友偏思爾容枯骨岸然祇聞寄遠字不見到寒邊
稚子應看長空囊誰爲憐明春有歸鴈莫惜寫新篇

潔之有志入山索贈

已知寒塞苦愛上別峯間掛鉢青松古安禪白石頑塵
何關隻杖亂亦到深山未歇狂心在溪流總不閒

立秋後一日孤鴈忽飛去四首

荒寺聊藏迹定知非久留庶無鷹隼患能免雪霜憂矯
首辭孤衲高飛覓舊儔江南兵未戢珍重荻花洲

秋至爾先覺空天翅獨橫既同艱險過亦有別離情度
塞宜高舉驚人莫浪鳴羅浮如可到愁絕是孤征
本是傷弓羽還愁羅網撻雖無好處去猶自惜餘生夢
警五更雨身輕萬里程似憐相聚久連叫兩三聲

上林非夙昔繫帛亦徒勞爾去從飄泊余心轉鬱陶空
庭添寂寂中澤總噉噉何日清江海孤雲許共翱

瀋陽雜詩二十首

草草四十載乾坤一病身臘深顏益厚禍酷意無瞋性
命豈由我飢寒常累人西鄰有二老談笑見天真

西風吹破寺泥佛坐何年一鴈起庭際數聲空唳天遠
書誰可寄飽食我方眠禪律渾忘却安能效磨磚

世事看亦見邊城忽已秋塵沙必在面蟣蝨又緣頭欲
笑從他笑多愁總莫愁所知居不遠來往儘風流

吁嗟復吁嗟誰是無父母守柵供庖厨入林禦豺虎得

生亦暫時盡死安足數新眼看舊人自然成糞土

盛衰自今昔佛豈限中邊竿木隨身戲鍼錐任衆賢到
山先數馬入室但分錢亦有二三子休嗟吾道邇

辛苦法王子深慈將柰何肉殘無足食骨碎可重磨大
網嫌魚漏高林畏鳥多不如魑與魅猶自喜人過

瘦日射枯楊荒荒欲斷腸老狐來瞰室餓虎易過牆豈
爲高明誤空遭紙筆殃南中有義士風雨每同床

此地暑易盡家家聞搗衣拽車水牯瘦擊鼓鬼娘肥風
景連年是人情半刻非老僧惟一鉢每日飽方歸

日日只斯須頻年乞海隅罪多識命賤書到益身孤秉

拂尋頑石題詩答腐儒明知鄉國沒仍夢到西湖

北里有遺老尋詩尚未還定知題落葉隨意到空山白
晝全無韻碁枰久已閒好携秋爽色一灑戶庭間

白鶴亦有淚悲涼與世同要從今日事稍見古人風笛
裏聲初斷囊中藥屢空只留天一線呼吸可能通

側立向空荒風吹恨愈長文章宜溷廁牛驥共禪房不
識梅花白惟誇麥子黃秋來瓜獨好小摘齒牙香

老翁時問訊不死近何如夢裏數竿竹床頭一卷書爲
人終直率對客怪麤疎午後睡方足行行過草廬

可惜團團月還來絕塞明照人幽近死到地自無聲孤

鴈忽然過遠鐘何處鳴嶺南應更苦夜夜落荒城
衛霍名何減山頭舊札營乍聞吹落葉猶似走殘兵原
草纏幽恨河流帶哭聲最愁秋雨後燐火向人明

未到秋風起先令破衲寒但拚身一擲久與世無干日
月看條去林泉到處殘如何昨夜夢顛顛荔枝丹

幾載望鄉信音來却畏真舉家數百口一弟獨爲人地
下反相聚天涯孰與鄰晚風連蟋蟀木佛共含辛

佛命亦如綫西方有剎蓮貝翻成大賈笙吹比神僊弟
子黃金貴弓裘白日鮮雷同吾豈敢只合抱沙眠

沙坡臺下土春老草難生行路踐心髓遊魂怯旆旌烏

貪天養子狐拜月成精當日無貧富鋒刀不世情
天地不可必春風或度關陰山一半揖遺老共生還杖
指烏衣巷船歸黃木灣親朋未盡鬼慟哭後開顏

夢安仲叔

昨夜分明見長鬚叔不癡衣冠非此日言笑尚前時縱
死心方寸平生酒一卮只愁關路黑來往得無疲

苦蚊

白日難容汝羣飛欲蔽天愁人頻得句終夜不成眠餓
極筋先露刑餘血尚鮮關東風景異只此似江邊

遊七嶺寺

何必入山去到來非世間巢松孤鶴冷補衲幾僧閒
磬留清範嵐煙護舊關一溪水漸解流水已潺潺

留龍泉靜室

入山如數日又是一春殘花信何曾到松風依舊寒野
禽時繾綣孤月共盤桓始覺邊關外猶然天地寬

寄題易修靜室

雖在名藍內孤栖別一枝身貧客自少地僻病相宜定
有雲分榻時煩月照眉我來應不拒煮雪共療饑

和李公冬日成茆屋四首用韻

數椽聊自可欹枕抱書眠窓闌堪延月茆疎好見天殘

羶猶馬革點雪卽花磚
塾老頻來過床頭起暮烟
不識長安樂何如東海隅
夜寒聞鶴語榻短學僧趺
興至詩塗壁飢來雪滿盂
西鄰遷客在鎮日待招呼
身閒居自僻豈必在山阿
寒炙青藜火行吟喧遍歌詩
能窮學士酒亦病維摩
向晚西風急何人著屐過
舉世皆兵革安居自朔庭
佛容參米汁客與論棋經
衾薄風侵骨心空月在扇
屢携孤杖去帶雪步荒坰

重和四首

自是客來少非關地獨偏
殘棋拋屋角饑犬臥爐邊
果賴鄰兒送詩憑野衲傳
情知無喜事鵲噪矮簷前

何事長邊外偏多魯國儒
談經偕楚獸卜築近枯株
窻破殘詩補肌羸薄酒扶
不知寒夜夢還上玉階無

敝絮蒙頭臥霜風柰若何
虛庭迎木客汲井煮桑鴉
適性此云足容軀不在多
小僅存道意袖手聽長歌

遠磧留天地無言雪一庭
正襟坐古詰開戶看滄溟
虎跡任來去人情半醉醒
老僧應不厭多病怯疎櫺

贈樂亭秀才

我苦不得去君胡爲獨來
無家投大漠設帳傍荒臺
客意黃花後書聲白雪堆
相逢三兩語涕泪點殘灰

送苗鍊師入燕

白日君將去黃墟我尚留莫言朋友義能免衆生憂殘
雪填沙磧悲心滿壑溝何時垂鶴翅盡駕入雲遊

贈五千道者

隻杖淒淒日論鄉獨有君辭家一萬里學道五千文禮
斗依丹闕吹笙坐碧雲不堪詢故老清泪亦紛紛

得耀寰札

相見亦常事相離費苦思翻憐二歲過未了一生疑函
泪遙相寄關心久已知長安春夢好猶自繞冰池

同陳子久坐候大翁回

稚子歡留坐主人出未歸料應無別適不過扣僧扉詩

卷携將去塞爐且共圍入門知有客言笑盡餘暉

大雨喜育子遠訪

相逢疑隔世一別五經年莫話鄉關事難禁風雨天尋
屍來萬里問道入重泉拗折枯藤杖沙寒且共眠

千山詩集卷七

博羅剩人可禪師著

書記今羞編

五言律二

別諸公往遠陽

一秋良可過鎮日共盤桓
談寂霜猶墮詩成月每殘
開懷偏有限握別恨無端
不出鄭圖外關河各自寒

同大來吉津赴啟如齋

出門何所往定是野僧家
踏破三門雪驚殘一樹鴉
登床無別禮堆案盡天花
得飽不辭去邊城日又斜

和麗大師送弼臣見訊韻

不作金門賦胡爲匹馬行親朋愁遠道生死見交情望
處關雲黑臥來江月清早歸余尚在海角待昇平

同陳公敘昔有感

不過廿年事還如隔數生逢君寒磧話動我涓陽情鄉
國餘殘夢乾坤未解醒獨憐孤杖外氣骨自相撐

同木齋坐甍築齋竟日

所談亦何異相共到黃昏閒或翻殘帙饑惟索瓦盤危
微千古事斷續幾人存此日真堪錄尋思無一言

讀李氏遺書二首

何期萬死後得見一生人久識灰銷骨欣看字有神每
憑心力盡洗古今塵莫恨余生晚當時無此親
舉世令人悶斯人以死爭開眸滄海窄點筆老天驚佛
祖無酸氣英雄有至情遺書今尚在再拜李先生

慰戴三病

三日不相見驚聞伏枕憂
疴羸力已竭號泣意無尤
未識趨庭樂彌深陟屺愁
春殘風尚勁珍重夜添稠

喜李鍊師禁足

人間亦何極隱几卽仙源
盡掃青牛跡深藏金馬門
閒應探藥笈靜可叩天根
咫尺三山近行看一鶴騫

重送大莖

艱辛吾與汝耐盡幾秋霜佛了無奇特人難是久長雲
山欣有伴風雨憶同床莫戀故鄉好相期塞菊黃

重送屍林

欲囑渾無語徒將泪幾行乾坤雙草履來去一空囊故
國何從覓寒冰已共嘗老人相見處休話汝師狂

送義中省親

相見復何日相期安可忘好携沙際雪聊慰髮如霜不
孝原非佛尋詩頗似狂濡毫題去袖春雨正茫茫

寄心公二首

念子何偏切爲人念獨歎相期一種意不在百年間古
聖了無異高名豈是閒遙知吟倦處徒倚望他山
別來頻雨雪心緒近如何子道承歡隔君恩出塞多高
山方咫尺白日已蹉跎自有無窮事時將訪薜蘿

答客問

似此已踰分平生我自知一從得罪後總是感恩時有
病還長嘯無家亦賦詩尚猶愁未足且晚欲何爲

雪下有感

大雪真吾事天心本至公翻書甘手冷乞食望年豐舊
嶺花方發平沙鴈已空幾多未歸客對此意何窮

入山寄友

到來方覺好山亦厭名聞世事憑蘿隔幽情與佛分猿啼幾樹月鹿過一溪雲此處真惟我相尋未許君

山中思友二首

知己從來少况當塞雪深每同開口笑遂覺緩愁心長聚亦無事初離便不禁如何此寒夜獨自臥孤岑相見已恨晚更添離別心幾多鄉國思翻向友朋深山古雲常寂天寒日易沉獨吟渾莫柰鐘磬自成音

同諸公夜集希焦二師室

弟兄能愛客老衲每來尋况有同心侶相偕徹夜吟異

鄉消積恨明月助清音何必求仙去花源此地深

又過希焦二師

好我真無爲感君此念深一從初識後數載到于今狂
極偏增重離多柰獨吟春風留洞口扶病更來尋

題金塔寺二首

人皆崇藻飾此獨尚清幽共佛二間屋連雲一個牛耕
田供客食開戶任麋遊最愛前溪水橫腰一帶流

人貧方徹骨塔尚以金名采蕨扶雲出尋詩踟月行斷
碑看字影馴虎聽經聲我到家常飯因留太古情

赤公書來賦答二首

書來惟說苦問我苦如何得食粗蔬足逢人好笑多拚
他今便死不爾且長歌只此朝還夕殘冬亦易過
我有消愁法從來肯易傳不歸吾本爾但飽卽欣然拾
得絲絲命由他泯泯天爲公通一線同病故相憐

自壽

投荒三十八又已八年過罪過隨年長閒情近日多懷
人添雪夢得句上山歌且自加飧好愁顏意柰何

憶昔

憶昔君初至難分喜與悲天邊親杖屨雪底見鬚眉屢
讀三都賦相爲一字師自今酬唱隔布袋有遺詩

儒釋

儒釋雖云異天涯放逐同五車開道路一棒擊虛空梅
州慚妙喜蜀國失文翁敢謂天將喪應知吾道窮

悼羸三首

有引

大方趙子憐子艱于步率諸公爲覓一小羸牛
頭馬身四蹄如鐵初不受駕馭既甚馴乘子出
入三年矣丙申暮春寄食友人得飽芻豆忽暴
亾子爲詩三章悼羸亦自悼也

淡泊幸相守殘軀賴爾扶忽然辭我去愈覺一僧孤牛
驥嫌同阜風沙怯遠途自今能解脫含淚奠生芻

一鉢同行乞三年不厭貧崎嶇勞曲折雨雪共酸辛何
忍拋愁骨翻如失故人言每舊竹杖彳亍更誰親
所苦不能待春深老漸長殊形寧受畜馴性最難忘溝
壑爾先俟冰霜我獨嘗傷心惟閉戶咫尺卽羊腸

布帷

世事憑茲隔高眠夢亦空青編落枕上白日在山中此
外無寧處何人可與同有時開放入溪月并松風

哭李給諫

山中愁未了走馬哭孤臣白髮隨江水青雲逐塞塵史
留忠憤疏天喪老成人幸有緋袍在年年漬淚新

和赤公寄韻

相見一平淡相離偏憶君每當此月夜遙望在城雲大
雪毋長視狂歌恐或聞歲窮宜倍慎三囑泪殷勤

遙送我存還巢二首

未得臨岐別何堪話別頻同爲黑水成况送白頭人長
路悲空橐還家失老親幾多兒女淚應爲洗邊塵
艱難知爾最大患在吾身莫憶來時恨偏添去路辛未
堪逢至戚猶恐訝諸鄰巢父真無罪牽牛飲潁濱

得我存長安寄來書用前韻

行後予方覺書來淚又頻到天還憶友一路但依人併

罪歸何碍携霜散所親不須回白首去住總皇仁

得石雲居詩文

尚論貴隻眼平生于此深共傳遷史筆誰諒許衡心後
死亦無恨斯文未喪今遙憐孤子意山水有知音

問雪公

山寒子可耐衣薄爾何禁學道身方重論文念獨深長
貧分鶴粒多病到僧心珍重過殘臘春來共笑吟

聞天公病

下堂猶有慮出塞念偏深不是子臣淚全然父母心或
者風方勁安能別有侵加飡憑努力春至候佳音

得木公手字

愛我知偏重知子乃獨深時時施藥石事事入肝心死
骨必思肉頑皮尚受鍼明知此不可又作感恩吟

和栖賢山居韻

有小序

阿字出棲賢山居詩十韻并其托鉢九江時所
和予讀之數過不翅身在三峽橋頭聽水聲洶
湧因而和之從頭至尾復從尾至首迴環重疊
音有盡而情無盡也

山水無中外飄雲何必歸最嫌沙上鴈一一向南飛罪
大心方死病多力漸微誰持匡嶽淚來洒破僧衣

何妨臥出日長欲話三更離外無人到窓前有虎行風
微飄梵咒雲密透書聲只此閒同過毋令別感生

無事不携筇多因訪遠松獨行深雪路忽聽隔溪鐘得
句鳴寒谷持雲贈別峯自來無定止到處幸能容

有言惟獨語更莫問青霄衣就田塍補柴分品字燒止
尋栖壑侶不赴在城招峯頂香巖寺鐘聲下半腰

出郭無多路心空覺地偏一從抱病後不敢向人前鸚
鵒留殘石素馨憶舊田止應吾與汝朗咏了殘年

高談山頂月低揖世間人判就孤寒命仍餘老病身我
心不可轉佛道未容真何處玉淵水惟應獨問津

閒知茅宇闌靜覺野雲忙僻逕人難覓深山日自長
携麩入室雪共雨登堂自起撥爐火因烹蘆菹嘗

大抵長邊外三冬半是陰風吹舊屋角雪補破衣襟樹
壓枝枝重燈寒夜夜深梅前初夢醒不柰此時心

每日一餐足無人白晝眠寒多寧有法懶極不須禪時
上巖頭石遙看林外田西南日盡處一直上孤烟

生來山野性萬死不離山隨水偶然出因風急復還吟
多長倚樹客到未開關自笑頑成癖人傳老更頑

夜半一擡首星光盡在山不能同雪化只合攬雲還猿
至常無候門開且莫關可憐猶有爾識我是真頑

率爾行將去倦來樹底眠
泉流時問話鳥宿似安禪
霜不凋金粟海難變硯田
每看敲石火一點自生烟
如何有好日不出又成陰
一任霜催鬢毋令泪漬襟
林泉寧有異天地此中深
竟夕寒如水空餘一寸心
不能效古昔鎮日爲人忙
樹影當窓直峯嵐入夢長
曉風輕布袖暮雪靜郊堂
更想峽橋畔平分一盃湯
展卷舊相識全非此日人
明明千古意寂寂一孤身
到死終無二平生只是真
最憐初睡熟又度大榕津
本無才足恃不是性多偏
沙石甘居後冰霜獨在前
難銷檀越水不種祖翁田
所以一瓢外風吹自歲年

五老何年見人間，隔九霄，黃精金井洗蒼朮，玉門燒未
遂。立沙志，翻將白紙招龍津。終有合携手，步山腰，
拘折此孤筇，隨心步步松。投林仍乞食，到午但聞鐘。十
年持一鉢，雙眼寄千峯。且莫臨溪照，恐驚憔悴容。
懷人幾千里，每夜過三更。擁毳時同坐，沿階又獨行。不
堪鳴綠色，常作虎溪聲。更有關心處，飛雲枕上生。
舊山畢竟好，垂老未言歸。遙想鶴峯上，終期華表飛。歌
殘山月白，聲咽夜鐘微。何日金輪頂，相將一振衣。

附栖賢原詩

愛友尋山住山深，人未歸不知秋色暮。空見鴈南

飛樹密溪雲重峯高霜月微夜來松火怯獨自理
寒衣 門前看五老石上待三更望月不知處沿
杉每獨行雲開見鶴影泉遠聞人聲莫訝無相顧
高情感易生 潦倒一枝筇逍遙十里松偶逢犢
鼻叟同聽石溪鐘驟雨不出谷晴雲隔亂峯忽覩
殘照起猶見金芙蓉 自笑吾生足支藤上紫霄
松門山日近野火石雲燒老母留芋供鄰僧隔水
招一聲樵笛響催我下山腰 老病心逾淡飢寒
韻更偏獨憐山月外無計秋風前拾粟煨牛火驅
茅下麥田明朝重九日容易度殘年 客到無留

處情乖懶見人牀頭多病衲殿角一閒身夜色秋
旻淨泉聲曉夢真昨聞江上信又阻白門津 我
自立溪上水流何太忙年年松樹綠日日峽橋長
林月窺巖戶山風壓草堂何人相見暇熟炙橘皮
湯 偶來楓樹下孤影息秋陰澗淺搖清瀨風輕
爽素襟行人歸竹遠散犢入林深何處不相似時
時厭此心 病骨憐秋夜夜長不可眠久疎蘆蕪
味慚愧白雲禪開戶望霜月隨身過野田晴峯山
勢聳一鴈入寒烟 山中嘗作夢夢裏不知山未
可名真妄何須辨入還夜泉寒竹簟秋月白柴關

同道如相憶歸來共學頑

張彌茂贈紅褐禪衣

空囊不羞澀猶自念僧寒頓使貧兒富能令白骨丹雪
埋深易見血洒濕難乾且得殘冬過何如破衲安

歲暮同阿字得寒字四首

經歲無人趣驚看臘又殘霜添窓紙厚風使衲衣單徹
骨寒無路捫心淚有端一從汝到後更益我辛酸

總是冰霜地非關我獨寒一身躡雪底雙眼向雲端索
句從朝起燒泉到夜闌此時兼此地猶得共團圓

細看生何用平生厭素飡泪將一歲盡事向五更攢海

靜三山穩雲高五老寒情知強言笑圖使我心歡
抖搜十年恨全傾大海寬看人忙不了于我竟無干爆
竹何曾響蠹魚依舊寒春風遲亦到且莫發長嘆

祀竈

竈無嫌我乞我自厭殘身十載猶存舌一瓢長傍人空
殮勞施主勺水賴神明此夜無須囑深知愧是真

擔水者

向陽寺止一井水涸且遠衆僧爭先往汲常至夜半而汲者猶往來不止焉

往來餘五里風雪到更深欲趁蛟龍臥寧愁魍魎侵絲
絲盡彼力滴滴感余心因憶舊山上飛泉到釜鬻

天公以其尊人所書扇見贈

艱危珍匣笥持贈慰荒榛乍展疑先晉徐看識故人老
來書自聖別久意逾真前日傳家信猶然寄問頻

天公贈棉衣留南塔先有此謝

念我寒如此臘終猶解衣數年惟破衲一半逐雲飛但
使存孤骨毋令嚇翠微故人戀戀意春氣透柴扉

聞爆竹和阿字韻

衰殘不可耐強逐小兒情山澤了無氣虛空忽有聲一
連三夜夢親到五羊城聽此翻添思髻年正太平

和天然兄初住栖賢韻

鹿洞曾經過難尋三峽橋老兄今又至浩氣可全消石

直潭邊靜泉飛谷口遙黃雲難極目夜夜夢魂搖

贈王大哥

不關裘馬事公子自翩翩戲彩春風裏尋僧野雪邊論
文憐遠戍飲酒瀉飛泉行看凌烟上功名本少年

讀梁未央贈陳全人詩有感用原韻

我昔見君日知君慕遠林方肩斯世重不作世間心古
佛機難扣孝廉船已沉未曾滄海變懷恨到于今

讀梁未央贈霍階生詩有感用原韻

太僕捐軀日相隨鴈一行蓮池心骨淨金櫃姓名藏五
嶺明臣節千秋重義方餘生愧我在風雪思難忘

寒宵二首

豈必緣鄉國啾啾鬧肺腸
天當愁處窄夜向醒邊長
海水流何極朋情散未忘
以茲難得曉星月共蒼茫

只是不能寐尋思總莫干
何人甘自溺于我竟難寬
照雪一燈白迎風雙眼酸
強眠仍反側非是畏衾寒

烏食菽爲沙彌所縛余見而釋之

口腹有深筭顛危實可憐
爲貪半粒飽遂惹百絲牽
人世殊多患空門亦自纏
殷勤爲解釋好去莫留連

金塔主人遣諸沙彌

長者亦多事初惟樹下居
但留孤鉢在何必戀耕鋤
鳥

散林偏靜雲飄月有餘自今吾與子茆屋本空虛

題一粟齋

一粟大如許其中世界藏臥聽宮漏水行拂御爐香天
近神仙赫恩多日月長野人頻到此破衲亦輝光

歲暮有懷

亦是尋常過憂來每覺頻爲當今歲暮無復舊鄉人烟
火投山店風霜冷水濱最憐江盡處上下嶺梅新

仲冬末忽大暖數日冰雪盡化

三冬剛踰半春氣變寒林但覺人禽悅誰知天地心崖
懸疑瀉瀑簷溜似長霖自入深山裏應沾帝澤深

題俗龕

亦自堆殘卷何曾一室空
文殊或過問彌勒也難同
畏客長疑病教兒未覺窮
只愁深夜後凍殺蠹書虫

天公新構茆舍觀音堂側

草草數間屋言依古佛居
僅能遮雨雪大半是圖書
梵唱連歌板棋聲雜粥魚
何須青瑣闥卽此樂如如

戴三移居鐵嶺

旣在大荒外何須近郭居
避人寧信虎奉母并携書
藥厭韓康賣田隨桀溺
鋤料當雪霽後曝背一思余

自八月初病耳至十一月不愈

病耳四經月耳根轉自清
鴉啼久絕響雲過似聞聲
簫鼓從來厭是非何處生
老年諸籟息毋復畏天傾

懷城中諸公

只在邊塵裏年年老別離
冰霜原共苦山水豈余私
有命荷皇澤無家感佛慈
願言各努力庶足慰相思

與孤松

仰瞻皆欲拜卽我亦難親
鶴語猶妨闢雪來不厭頻
枝危如接世根拙似嫌人
轉厭冰將解羣芳共一春

偶成二首

豈是愛山水從來任我真
嫚松寧有罪叱石不生瞋
歌

發隨長短倦時任屈伸回思塵世內束縛可憐人
好惡非他事尋思可柰何地低停雪厚樹密惹風多來
日誰堪慮今宵我且過莫爲長久策仰面儘高歌

木公以新齋成述懷詩六首寄山中依韻奉和

何處投新句松關日已曛傾來千斛雪驚起一山雲蘿
影枯逾瘦泉聲凍尚聞相期春漸暖一榻可平分

著雪心難冷攤書道未窮茆簷宜向日布帽且禁風味
淡君無厭吟寒孰與同時應招野叟興發一枰中
拚是擲窮邊心休莫問天小窓容晝景薄粥喜朝烟汲
古終無罪買山不用錢倦來拳作枕身在古皇前

擔泉知不遠久息丈人機地僻誰堪覓庭閒鳥亦稀但
能藏海畔何必羨漁磯祇合長相問氍毹幾衲衣
酒茄隔疎籬無人水半卮望雲時有泪聞鳥不勝悲飽
食閒何慮孤眠冷莫辭惟應與松栢寂寞保霜姿
只在鐵橋畔寒梅繞屋花可憐清曉夢喚醒隔窓鴉歲
暮日逾促鄉遙愁更賒那堪幾相識咫尺卽天涯

聞左九哥病寄慰

君今年正少早撇少年情滅性非人子傳家賴阿兄
鴈歸春漸近磧遠雪初晴努力加餐飯無令百感生

贈高涵寰居士

所重惟良友兼之患難同長齋親衲子獨宿傍仙翁交
道真逾淡文情老益工只愁風雪後孤迹任飄蓬

贈高辛齋居士

出塞有諸子惟君氣獨雄見金曾似土飲酒每如虹生
死重然諾文章到困窮莊周何日了相對共談空

喜無爲三子至二首

見說南中士東來道阻長何須問姓字自可共冰霜積
大堪埋骨天空欲斷腸相看強相笑不敢問家鄉

盼盼似人喜蹙然慰我心暫停新泪下一見故情深夢
裏秦淮鼓山前虎豹林從今風雪際又聽操南音

贈普願師

咫尺幽居近晨昏獨扣門閒談驚鬼膽靜對見天根禮
法豈爲我畦蔬儘可飡焉知寒塞外古道至今存

聞戴三將入長安

春風得意初策馬莫躊躇未獻金門賦先懷梁獄書君
恩從此濶子道乃無餘佇看章江上青衫伴素車

人日有感

此地無人日蒙頭且自過驚心非虎兕刺眼是山河風
度衣逾薄霜侵鏡已皤更添愁寂處鐘磬晚堂多

留題首山丈室

出郭剛十里到來隔世譁不知誰是主卽此便爲家半榻懸清夢踈櫺見晚霞幾年淪落意盡付海東涯

宿向陽寺

但使忘人世居山何必深斷雲栖破衲積雪老禪心客去門仍掩牀空月每侵病夫怯登陟只此易相尋

遊大安寺

石磴如天上鐘聲下界聞已捫千丈雪猶隔幾重雲山冷僧俱瘦堂閒虎與羣古碑苔蘚合洗剔見蟲文

遊龍泉寺

洞口憑猿引逶迤石路迨到門惟虎跡望寺在山腰龍

去泉仍溜春殘雪不消老僧忘歲月恍惚話前朝

遊祖越寺

殿闕疑天闊淒淒幾個僧板橋通野豕木佛坐孤燈說
法呼頑石燒泉拾古藤禪居高絕處欲止病安能